

## —Mahathir berlepas ke Eropah hari ini

**KUALA LUMPUR, Ahad** — Timbalan Perdana Menteri Datuk Seri Dr. Mahathir Mohamad akan berlepas ke Eropah esok bagi mengetuai satu rombongan galakan pelaburan Malaysia seramai 80 orang untuk mewujudkan hubungan terus dengan usahawan dan pemodal di Switzerland, Sweden dan negeri Belanda.

Menurut kenyataan Lembaga Kemajuan Perindustrian Malaysia (FIDA), rombongan tersebut juga akan menggesa usahawan dan pemodal di negara-negara tersebut memberi perhatian terhadap potensi pelaburan di Malaysia.

Rombongan tersebut yang akan berada di luar negeri 12 hari akan memberi peluang kepada usahawan dan pemodal di negara-negara itu mendapatkan penjelasan lebih jelas tentang dasar-dasar Kerajaan Malaysia terhadap pelaburan asing.

Datuk Seri Dr. Mahathir yang juga Menteri Perdagangan dan Perindustrian akan berucap mengenai kemajuan ekonomi di Malaysia dan dasar-dasar terhadap pelaburan asing di Seminar Pelaburan Am yang akan diadakan di Zurich, Stokholm dan Amsterdam.